

Un anochi Cubano Arubano inolvidabel na Biblioteca



ORANJESTAD – Diahuebs anochi cu un sala di Biblioteca Nacional na Playa completamente yen... yen di hende... yen di nostalgia y yen di emocion a tuma luga e actividad pa conmemora e migracion di Arubianonan pa e isla di Cuba na final di 1800 y na cuminsamento di 1900, prome cu refinancia di LAGO a cuminsa opera riba nos isla.

E linguista sr. Mirto Lacle kende a fungi como MC durante e anochi aki a declara na Bon Dia Aruba su satisfaccion di por a contribui cu un

actividad di e caliber aki cu a haya hopi acogida. E tabata un programa completo bon hinca den otro cu a destaca aspectonan cultura y convivencia entre ambos isla.

3G di Hendrick Lacle

Un di nan tabatin di haber cu e generacion nobo di un Arubiano di pura sepa cu a bay cu apenas 13 aña di edad pa Cuba, y riba e anochi aki tabata presente tres generacion di dje cu a nace y a lanta na Cuba. Ta trata di Hendrick Lacle kende a fayece cu 86 aña na e isla aki. Hendrick su yiu mas chikito tabata presente cu su casa Maria Elena Lacle-Sanchez, mientras su yiu muhe y su nieta Vicky ta

na Cuba. A wordo presenta un documental “Un casca di Pinda den Caribe”, traha pa sra. Lacle-Sanchez cu a recrea e Cuba di antes y a rescata parti di e memoria familiar di su suegro.

Igualmente a wordo recorda e memoria di Kay Chu kende tabata un mucha homber di 13 pa 14 aña cu na aña 1964 a wordo declara como desaparece dilanti di nos costa y despues el a wordo haya hoga.

Sr. Mirto Lacle a bisa cu nan a trece e historia aki, ya cu Hendrick Lacle tambe a wordo declara como desaparece y despues di 34 aña su famia a bin sa di dje.

Tabata un momento masha emocional ora cu sra. Digna



Lacle-Herrera a relata e historia aki cu su suegra mes Julia kende tabata mama di Hendrick a conta. E tabata un testimonio masha elocuente y emocional. Digna su difunto casa Cacilio tabata ruman di Hendrick, y Cacilio hunto cu Daniel Kelly a percura pa busca su ruman perdi na Cuba. Sr. Mirto Lacle a bisa cu bale la pena destaca e labor cu e diplomatico Curasoleño sr. Jeffrey Corion a haci pa asina facilita e feliz encuentro familiar aki.

Reconocimento

Ex-Gobernador sr. Olindo Koolman tambe a rescata for

di olvido e nomber di tres Arubiano cu a bay biba na Cuba. Den un documento na Spaño tocante tata y yiunan Arubiano cu durante 10 aña a traha na Cuba, ex Gobernador Koolman a menciona e nombenan di: Jacobuce Petrus Koolman; Theodoro Johannes “Doy” Koolman y Francisco “Chico” Koolman cu a yega di establece na Cuba. Na final un reconocimiento masha mereci a wordo entrega na sra. Digna Lacle-Herrera y sra. Maria Elena Lacle-Sanchez pa nan esfuerso y trabou pa rescata herencia cultural y patrimonio historico entre Aruba y Cuba. □